

Tsgha ta lwa Pwal ŋa La Filipiya

Ga zgu

¹ I'i Pwal kawadaga nda Timute, kwalva Yesu Kristi ŋni. Ta ga zgu ŋni ŋa ghuni inda mnduha Lazglafta ma Yesu Kristi, ma luwa Filipiya. Nda gwal ta ngha kaghuni, nda gwal ta ksaghunatá slna tani.

² Ka vlaghunavla Da mu Lazglafta nda Mghama mu Yesu Kristi ta zdakatahudani nda zdakwani.

Rfay Pwal ta Lazglafta

³ Inda fitika ndananŋta da ta kaghuni ya ná, ta rfanagharfa yu ta Da da Lazglafta.

⁴ Inda fitika magay da ta du'a da Lazglafta ta ghəŋa kaghuni ya ná, wadah ŋudufa da.

⁵ Ta rfay yu ta Lazglafta, kabga daga ma fitika zrafta* ghuni ta nzaku ka gwal ta zlghaftá Yesu Kristi nda ŋuduf, ha ka sagha ta gita, nda guya kuni kawadaga nda i'i ma slna mna gwada Lazglafta.

⁶ Grafgra yu kazlay: Zlrafzla Lazglafta ta maga ŋərma slna ma ŋudufa ghuni kə'a. Dza'a kdanŋkda ta magay ŋa kdɪŋtani baɗu vragata Yesu Kristi†.

⁷ Tsa ndanu ta ndanu yu ta ghəŋa ghuni ya ná, tɗukwa nzakwani, grafgra yu, kabga laghula kuni da ŋudufa da. Kaghuni demdem kawadaga kuni nda i'i. Nda guya mu ma zdakatahuda Lazglafta, ma na nzakwa da ma gamak ná, nda ya ma ŋavata

* **1:5** Ngha ta Slna gwal ghunay 16:13-15. † **1:6** Gray nda 1:10, 1 La Kwareŋt 1:8.

ta ηavata yu ka mnigiŋtá gwada Lazglafta kah-wathwata ka dihavata ka zlarđatá Lfida Gwada.

⁸ Nda sna Lazglafta kazlay: Ta đvudva yu ta kaghuni katakata kə'a. Đvudva yu ta kaghuni ma kdavakta hyahya ηudufa da ma Yesu Kristi.

⁹ Wya skwi ta magə yu ta du'a da Lazglafta ta ghəŋa ghuni: Ka dza'a kuni ta kəma ta kəma nda đvutá sani nda sani. Tsaya dza'a kəl kuni ka snaŋtá skwi đina, ηa snaŋta ghuni ta dganatá ηərma skwi nda skwi kul đinaku,

¹⁰ ηa snaŋta ghuni ta zbaptá skwi đina ηa magay ghuni ta slna nda tsi. Kada nzakwa kuni ka gwal tđukwa kul had rutsak ta kaghuni ha bađu vragata Kristi.

¹¹ Nə nzakwa ghuni ka gwal maga skwi tđukwa nda mbrakwa Yesu Kristi. Na nghanŋa mnduha ta tsa ηərma skwi ta magə kuni ya, ηa zləzlvay taŋ ta Lazglafta, ηa vlay taŋ ta glaku ηani guli.

Takwa Lfida gwada ma luwaha

¹² Zwanama da, wya skwi ta kumə yu ta snaŋta ghuni: Nana ghuya đanŋwa ta slidighata hadna na ná, hlana a ta mna gwada Lazglafta wa. Katək ná, ta kəma ta kəma ta kla tsi.

¹³ Skwi kəl yu ka mnay mantsa na: Inda gwal ta nŋha həga ηumna la Ruma, nda inda hamata sanlaha ma mnduha ná, nda sna həŋ kazlay: Nda tsa yu ma gamak kə'a ta ghəŋa magay da ta slna ηa Kristi‡.

¹⁴ Sana skwi guli ná, nana nzakwa tsatá i'i ma gamak na ná, zəghər gwal sganagha tsi ta mbrakwa faftá ghəŋ ta Mgham Yesu na həŋ

‡ 1:13 Gray nda Slna gwal ghunay 28:30, Afisus 3:1, 4:1.

mataba gwal zlg hay nda ɲuɖuf. Nda ta us tira taɲ ka dza'a ta kɛma ta kɛma ma mna gwada Lazglafta ɲa mnduha.

¹⁵ Aɲ mndani! Ka draku ta mna sanlaha ta gwada ta Kristi. Sanlaha ya, nda ɲuɖuf turtuk ta mna hahɛɲ.

¹⁶ Tsa hahɛɲ ya, ta mnay hɛɲ kabga ɖvuɖva hɛɲ ta i'i. Nda sna hahɛɲ kazlay: Lazglafta ta ghunaktá i'i da hadna ɲa dihavata ɖa ka zlerɖatá Lfida Gwada ɲa mnduha kɛ'a.

¹⁷ Tsa gwal draku ya ná, ta mnay hahɛɲ ta gwada ta Kristi, kabga ta kumay hahɛɲ ta malaghuta ka i'i. Nda ɲuɖufa taɲ a ta mna hɛɲ ta tsa gwada ya wa. Ta kumay hɛɲ ta sgidighatá ghuya ɖaɲwa ma na gamak na.

¹⁸ Kuzliha a tsaya ta i'i wa! Dɛr maklɛwmaklɛw ta mna hɛɲ, mnamna hɛɲ ta gwada Kristi, ta rfu yu ta ghɛɲani tafa. Manda va tsaya, ta kɛma ta kɛma ta dza'a i'i nda rfay.

¹⁹ Nda sna i'i kazlay: Dza'a mbaku yu ma tsa ghuya ɖaɲwaha ya, kabga du'a ghuni. Ta katay Sulkum nda ghuɖa ma Yesu Kristi ya ta i'i guli kɛ'a.

²⁰ Skwi ya ma ɲuɖufa ɖa faf i'i ta ghɛɲa ɖa tida ná, had yu dza'a walaɲta magatá skwi dza'a pghidaghatá hula wa. Má vlihata skwi ta mbrakwa su'ay yeya katsi. Skwi kumaf maya ɖa ndanana, dɛr má yawu tsi, ka dɛr ta ndiri yu, ka dɛr mtaku a ta slidighata, ka zlezlva mnduha ta Yesu Kristi nda ma nzakwa ɖa, ɲa ɖa.

²¹ ɲa i'i tafa, ka tata hafu yu ná, Yesu Kristi na ɲɛrma skwa ɖa. Ala ka nda mta yu ya guli, ndela ɖa tsa.

²² Ka tata nzaku yu nda hafu katsi, dza'a magay yu ta slna ɲa katanɲá mnduha. Ka mantsa tsi katsi tama ná, sna a yu ta skwi ɲa psa'ata da wa.

²³ Ta tada i'i tsa skwiha ya his his. Mtuta da má si ta zdíghata ɲa dza'a da nghanɲá Yesu Kristi, si má mal tsaya yu.

²⁴ ɲa kataghunata guli ya, dína nzata da nda hafu.

²⁵ Mantsa ya nzakwani grafgra yu. Ta dza'a nzanza yu nda hafu, ɲa nzata da kawadaga nda inda kaghuni, ɲa kataghunata ma dza'a ta kəma ta kəma nda rfu ta tva Lazglafta ma zlg hay ghuni nda ɲuduf.

²⁶ Mantsa, dza'a sgavaghasga ghubaray ghuni ta Yesu Kristi, kabga nghanɲa ghuni ta i'i, vrəgladaghar yu da kaghuni dza'azlay.

Navata ka ɲa Lfida gwada

²⁷ Skwi ná, nzawanza ta nzaku ya ta raku ɲa nghanɲa mnduha kazlay: Gwal ta maga skwi manda ya ta mnə gwada Kristi kuni kə'a. Skwi ta kumə yu ta snaɲta ná, ta nzaku ka kuni manda ya ta raku. Dər má labla yu da kaghuni, dər má labə a yu da kaghuni wu, nda guya ka ghəɲa ghuni. Ta ɲavaɲa ka kuni nda ɲuduf turtuk ka dza'a ta kəma ta kəma nda mna gwada Lazglafta.

²⁸ Yaha kuni zləɲa ghumaha ghuni. Ka zləɲaf a kuni ta həɲ wu katsi, tsaya dza'a kəl həɲ ka snaɲta kazlay: Dza'a tsanaghatsa Lazglafta ta guma ta həɲ kə'a, ta mbaghunaftá tsi ta kaghuni. Da Lazglafta tsaya.

²⁹ Zdaghunanɲda Lazglafta ta hudí nda ma Yesu Kristi kəl kuni ka zlg hafta. Zlg hafta ghuni

kwenkwen yeya a wu, ta ghuyay kuni ta danwa ka nani guli.

³⁰ Nda ngha kuni ta wdawda[§] yu. Ndanana, nda sna kuni kazlay: Tata wdaywday yu ka'a, ka lamə kaghuni guli dida.

2

Nzaku nda dzratawi

¹ Tsa ndi'atá vgha ghuni nda Kristi ya a ta vlaghunatá dra nufuf ra? Tsa dnuvaf tsi ta kaghuni ya a ta mbra kaghuni ra? Nda sulkum nda ghuba a guyatá vgha ghuni ra? Ta dnuvustá vgha a kuni sani nda sani mataba ghuni ra? Ta tawa hidahida a kuni sani nda sani mataba ghuni guli ra?

² Ka si mantsa tsi, kada zdififta kuni ta nufufa da ná, nzawanza nda dzratawi. Ka dva kuni ta sani nda sani. Ka skwa turtuk ka nufufa ghuni, ka ndana turtuk ka ndana ghuni guli.

³ Ma dagə kuni ta vgha ka gla ghəŋ, leŋtekwə ka kuni nzata. Ka mali ta ghəŋə kaghuni ka kuni ngha mnduha.

⁴ Inda kaghuni, ma laghu kuni nghutá ghəŋə ghuni, nghapwa ngha ka sanlaha. Mantsa ya dza'a kəl kuni ka zdififta nufufa da.

Nzakwa Yesu ka kwalva

⁵ Magawamaga ta skwi ya nda ra, ma ndi'atá vgha ghuni nda Yesu Kristi.

⁶ Kulam nda nzakwa tsatsi ka mnda turtuk nda Lazglafta, zbanj a ta nzaku ka guram nda Lazglafta* wa.

§ 1:30 Ngha ta Slna gwal ghunay 16:19-40.
Zrafta 3:5.

* 2:6 Gray nda

- 7 Ka zlanťá tsi ta tsa vli ya ka niňťá ghəŋani ka kwalva†, ka nzaku tsi manda mndu. Ma tsa nzakwani manda mndu ya,
- 8 ka hanaganatá tsi ta ghəŋani, ka snatá tsi ta ŋa Lazglafta, ka mtutá tsi. Tsa mtakwani ya ná, ta udza zləŋay mtakwa tsi.
- 9 Tsaya kəl Lazglafta ka kapanafta ka vlanťá glaku, ka vlanťá hgu ya ta malaghutá hga inda skwi demdem.
- 10 Na hganťá hga Yesu ya, inda gwal ta luwa, nda gwal ta hadík, nda gwal ma hadík, ta tsəlbu ta kəmani.
- 11 Inda mndu dza'a mnay nda wani kazlay: Yesu Kristi Mgham‡ kə'a, ŋa zləzlvay tan̄ ta Lazglafta ta nzakway ka Da.

Nzakway ka tsuwadak ma ghəŋa hadík

12 Zwanama dá gwal ta d̄vu yu nda ŋudufa dá, ya wya nda sna kuni ka Yesu hanaganatá ghəŋani mista Lazglafta ya, hanaganawahana kaghuni guli ta ghəŋa ghuni mistani. Ma fitika nzakwa mu kawadaga ná, si ta snay kuni ta gwađani. Magawamaga manda va tsaya daga ndanana dər had̄ yu kawadaga nda kaghuni. Kawadaga nda zləŋa Lazglafta, magawamaga kaghuni guli ta slna nda tsa mbaku vlaghuna lu ya.

13 Lazglafta kaghəŋani ta maga slnani ma kaghuni, dza'a kəl kuni ka d̄vaftá skwi ya ta zdəganata ŋa magay ghuni ta slna nda tsi guli.

14 Ma inda skwi ta magə kuni ya, ma rurun̄waku kuni ta rurun̄waku, ma zlərdə kuni ta wi.

† 2:7 Gray nda Isaya 52:13-53, Mata 20:28. ‡ 2:11 Aya 10-11: Ta gray ta vgha nda Isaya 45:23.

¹⁵ Kada nzakwa kuni kul had rutsak ta kaghuni, nda ghuḅa. Kada nzakwa kuni ka vərda zwana Lazglafta kul had maslivinza ta kaghuni mataba mnduha nda ḅadza ta maga ḅədzaku ta na ghəṅa hadikṢ na. Nzawanza ta wdaku mataba taṅ manda gumbəzla,

¹⁶ ka vlanṅta kuni ta gwada hafu ta həṅ. Ka magamaga kuni mantsa, dza'a rfu yu baḁu vragata Yesu Kristi, kabga nzata a tsa slna ṅava yu ta magata ya ka bətbət wa.

¹⁷ Tsa zlghay zlghaf kuni ta Yesu ya ná, nda nza manda planatá ghəṅ ta Lazglafta*. Ka waya ka skwi dza'a dzadza həṅ ta i'i, dza'a nzakway usa ḁa ka skwi dza'a tḁanaghata yu ta ghəṅa ṅa ghuni. Ka mantsa tsi katsi, dza'a mamu yu nda rfu, dza'a rfay yu ta rfu kawadaga nda kaghuni.

¹⁸ Kaghuni guli ka nzata kuni nda rfu. Ka rfa kuni ta rfu kawadaga nda i'i.

I Timute nda Ipafrudita

¹⁹ Nda mbrakwa Mghama mu Yesu, nda fa ghəṅa ḁa ta ghunadaptá Timute da kaghuni dazlay ṅa vlaghunatá mbraku, ṅa vragaptani da rusidiftá tva nzakwa ghuni, ṅa vlihatá mbraku ta i'i guli.

²⁰ Tsatsi yeya nda ndanu manda ṅa ḁa mana vəl na, Ndaḁa a ta ndana tsi ta kaghuni wa.

²¹ Inda hamata sanlaha ná, skwi ta zdəganatá ghəṅa taṅ yeya ta ndanu həṅ, had həṅ ta ndana skwi ta zdəganatá Yesu Kristi wa.

²² Kaghuni, nda sna kuni kazlay: Nṅerma mndu Timute kə'a, ksagapksa ṅni ta slna mna gwada

Ṣ **2:15** Ta gra vgha nda Vrafta ta zlahu 32:5, ka ta nghay lu ta gwada Grek ṅa ghalya. * **2:17** Gray nda Timute 4:6.

Lazglafta kawadaga nda tsi. Katihakata ma slna manda zwan̄ ta kata dani ma slna.

²³ Tama ná, kd̄iŋta taŋ ta dgiŋtá gwada ta i'i ya, dza'a gi ghunadapghuna yu da kaghuni.

²⁴ I'i guli nda fa ghəŋa da ta Mghama mu, dza'a gi labla yu da kaghuni dazlay.

²⁵ Dina ka ghunadaghunapta da ta zwan̄ama da Ipafrudita†, gra ta ksa slna da ta wudə ŋni ta slna kawadaga nda tsi. Tsatsi mndu ya si ghunagap kuni nda skwi ŋa katihata.

²⁶ Si ta ndanay ta labə da nghaghunaghata manda snan̄tani kazlay: Snaghunaghasna si kwalani kul dughwanaku kə'a. Nda sli'a ghəŋani ŋa labə.

²⁷ Kahwathwata, si nda ksa da tsa dan̄wa ya, wər ghatalakw ta psaghutá hadik ta ghəŋani, əŋka'a ka Lazglafta ta tawatá hidahida tida. Tsatsi nda ghəŋani yeya a tawa tsi ta hidahida tida wu, nda i'i tani. Yaha ŋuduf dzaghata kə'a nda i'i kəl tsi ka mbanaf̄ta.

²⁸ Zdigihazda tsa ghunədaghunapta da ya, ŋa nghan̄ta kaghuni nda ira ghuni, ŋa rfay ghuni ta rfu, wutsan̄ ndana i'i dza'azlay guli.

²⁹ Ka ḡhadapḡha tsi ya, ka zlghafta kuni dina, ka rfa kuni ta rfu, kabga zwanama kuni ta tva Mghama mu Yesu. Vlaŋwa glaku ta mndərga tsaha ya ma mndu.

³⁰ Pərda ka mtuta ta ghəŋa slna Kristi, fafa ta ghəŋani ŋa kata i'i da manaka kaghuni.

3

† 2:25 Ngha ta 4:18.

Fafta Pwal ta ghəjani ta Yesu

¹ Kdāvakta gwada da zwanama ná, rfawarfa ta rfu kabga ndi'atá vgha ghuni nda Mgham Yesu. Va tsa gwada si vindaghunaf yu ya tata vrafta yu tida, hərfava a yu ma vəl vindgəлта wu, dīna tsaya ɲa haghunamta ma ghəj ɲa kata kaghuni.

² Mantsa tama, dasuwa ka kuni nda gwal ta maga ghwadaka slna, tsa la kriha* ta ndana datsiɲtá fafaɗ ya.

³ Katək ná, amu vərda gwal ta tsa fafaɗ, ta maga du'a da Lazglafta nda mbrakwa Sulkum nda ghuɓa, ta ghərɓaku ta Yesu Kristi. Had amu ta walaɲta faftá ghəj ɲa mu ta skwi ta maga'ata mnda səla wa.

⁴ Ka si ɲərma skwi, skwi ta maga'ata mnda səla katsi ná, ma dihafdiha i'i guli ta vgha da tida. Ka si mamu mndu ta mnay kazlay: Ta skwi ta maga'ata mnda səla ta fafta yu ta ghəj ɲa da kə'a katsi ná, má mal i'i tama.

⁵ Kəl yu ka mnay mantsa na: Buzula la Hebru i'i, zivra la Isra'ila, mndəra la Benzamenj. Ta má tghasa fitik manda yata lu ta i'i tsihata lu ta fafaɗa da. Tvə zlaha la Yahuda guli ná, tekw i'i mataba la Farisa.

⁶ His his dzvu ɲanata yu ta tva nzakwa la Yahuda ha ka ghuyay da ta daɲwa ɲa gwal zlghay nda ɲuduf†. Had zlaha la Yahuda zlanaghu yu dər turtuk wa. Had sana skwi dza'a tsadivata lu wa.

⁷ Mamu ndela da mida ka yu sizlay, tsaw nda nza tsa skwiha ya ka skwi bətbət, kada ɲatsafta yu ta Kristi katək.

* **3:2** Ngha ta Mata 7:6. † **3:6** Ngha ta Slna gwal ghunay 8:3, 22:4, 26:9-11.

⁸ Mantsa ya nzakwani, ka skwi bətbət inda tsa skwiha ya da i'i, kabga nda sna yu ta Yesu Kristi Mghama da. Malaghumala tsatsi ta ghəŋa inda skwi, kəl yu ka pghinṭá inda hamata skwi. Manda nḗḗdak ta ngha yu ta tsa skwiha ya, kada ndi'afṭa yu ta vgha nda Yesu Kristi,

⁹ ŋa nzakwa da dekdək ka ŋani. Walglaŋṭa a i'i ta mnay kazlay: Tudukwa mndu yu kə'a ta kəma Lazglafta, kabga snata da ta zlaha la Yahuda wa. Skwi ta nidifṭa ka mndu tdukwa ta kəmani ná, vəl zlglafta da ta Yesu Kristi ya. Lazglafta ta nidifṭa ka mndu tdukwa, kabga zlglafta da.

¹⁰ Skwi turtuk ta kumə i'i ná, snaŋṭa da ta Kristi nda mbrakwani ya kəl tsi ka sli'agapṭa ma mtaku. Ta kumay i'i guli ta ghuzlaŋṭa da ta iri manda ŋani, ŋa nuta da manda tsatsi ma fitika mtakwani ya,

¹¹ ŋa laviŋṭa i'i guli ta sli'agapṭa ma mtaku manda ŋani.

Hwaya ŋa kḗanakta

¹² Mna a i'i kazlay: Nda ghada kḗanakta da kə'a wa. Mna a i'i kazlay: Slafsla i'i kə'a guli wa. Ta ghəŋa ŋavata ka dza'a ta kəma ta kəma kada kḗanakta yu ta ksamta da dzva da yeya ŋa da ta magay, kabga nda na yu ka ŋa Yesu Kristi.

¹³ Mantsa ya nzakwani zwanama, mna a i'i kazlay: Ksamksa yu ta tsa skwiha ya ma dzva da kə'a wa. Kḗavakta skwi ta magə i'i ná, zanapṭá skwiha ta luta, ka ŋavata ka dza'a ta kəma ta kəma ŋa ksaktá tsa skwi ta kəma ya ŋa da.

¹⁴ ŋavata ka dza'a ta kəma ta kəma ŋa kḗanakta, ŋa mutsa nisəla vəl hgafta hgaf Lazglafta ta amu,

ña dá. Tsa nisəla ya ná, nzata dá ta luwa kawadaga nda tsi nda ma Yesu Kristi ya.

¹⁵ Mantsa ya skwi ña ndanay amu gwal nda ndəha ta tva Lazglafta. Ka had kuni ta nzaku manda tsaya wu, dza'a tsalaghunaptsala Lazglafta.

¹⁶ Mali ma skwi na kdan̄ta mu ta ksa na tvi ksaf mu na nzakwani.

¹⁷ Kaghuni demdem zwanama dá, ksawaksa ta sada dá, fafwa ira ghuni ta gwal dina mbada tan̄ manda ya ta nghə kuni ta mbada an̄ni ya.

¹⁸ Nda ndəgha gwal ta nzakway ka ghuma mtatá Kristi ta udza zləñay, ka yu si ta gdata ta mnay ña ghuni. Tata kdan̄kda yu ta mnay guli ña ghuni ta nda va nana nda taw nda taw.

¹⁹ Kdāvaktani ná, dza'a zwađu zwađa hən̄, kabga fafa hən̄ ta hudá tan̄ ka Lazglafta tan̄. Dər skwa hula‡ ta magə hən̄ ná, rfa tan̄ ña tan̄. Ta ghəña skwa ghəña hadik yeya ña tan̄ ta ndanay.

²⁰ Amu ná, ta luwa vla nzakwa mu. Mghama mu Yesu Kristi mnda mba amu dza'a saha ta luwa da slamaghatá ña amu ña kzlay.

²¹ Sahani dza'azlay ná, ña mbəđanaftani ta na vgha mu kul had hayhayani na, ka ñlanaf̄ta manda ñani, nda mbraku ya kəl tsi ka nzanaghatá inda skwi, dza'a maga tsi.

4

Vla hidaku

‡ **3:19** Hudá tan̄; (gray nda Ruma 16:18, Kwalasuha 2:16, 20-21.) Pəghanaghatá hula ta hən̄; Nghanaghatá tsa fafad̄ (gray nda Galat 6:13, 15).

¹ Zwanama da gwal d̄vu yu nda ṅuḍufa da, mamaya ghuni ta ksihata, ta kumay yu ta nghəglan̄tá kaghuni. Ta kaghuni ta ghərba yu ta ghərbāku, ta kaghuni ta rka yu ta rka. Ka si mant̄sa tsi tama zwanama, nzafwanza ta Mgham manda va ya taghaghunaf yu.

² I Ivudi nda Siṅtika, wyawa dzvu, nzawanza nda dzratá ghəṅ, kabga nda guya kuni ta Mgham turtuk.

³ Ka yu ta mnaghatá kagha guli gra ta ksa slna da ná, wya dzvu, katan̄kata ta tsa mi'aha ya. Nda tsa mi'aha ya, nda Kliman̄, nda hamata gwal ta ksa slna kawadaga nda i'i, dagala slna maga hən̄ kawadaga nda i'i, ghuyghuya ṅni ta dan̄wa nda hən̄ ta mna gwada Lazglafta ṅa mnduha. Hahən̄ ná, vindafvinda Lazglafta ta hga tan̄ ma defteri ta vindi tsi ta hga gwal ta mutsa hafu*.

⁴ Rfawa ta rfu ma nzatá nzakwa ghuni ma Mgham Yesu. Rfawa ta rfu ka yu ta vrəgliṅtá mnaghunata.

⁵ Nda zd̄aku ka kuni nzata nda inda mnda səla, ndusa Mgham Yesu ka saha.

⁶ Yaha kuni ndana sana skwi†. Ka mamu skwi ta ndanə kuni ya, dawawadawa da Lazglafta nda maga du'a, nda rfanaghata guli.

⁷ Ka mant̄sa ya ka kuni magay katsi, dza'a vlaghunavla Lazglafta ta zd̄aku, zd̄aku ya ta malaghutá mbrakwa mnda səla, ṅa ksaghunamtani ta ṅuḍufa ghuni nda ndana ghuni guli ma Yesu Kristi.

* **4:3** Gray nda Suna Yuhwana 3:5. † **4:6** Gray nda Mata 6:25-34.

⁸ Zwanama dá, wya kdávakta gwada dá: Skwi ña ñanata ghuni ná, ñanawa ña ta inda kahwathwata, nda inda skwi dina ta ghubu lu, nda inda skwi tdukwa, nda inda skwi nda tsala, nda inda skwi ta raku ka mamay, nda inda skwi ta raku, nda inda skwi ta dinuta, nda inda skwi ta raku ka zlazlvay. Tsaha ya skwiha ña ñanata ghuni ma ghəña ghuni.

⁹ Magawamaga ta skwiha taghaghunaf yu, nda skwiha mutsaf kuni ta snan̄ta da i'i, nda skwiha ya nghan̄ kuni ta i'i ta magay guli. Tsaha ya skwi ña magay ghuni, dza'a nzan̄a Lazglafta ta vla zdaku kawadaga nda kaghuni.

Rfanaghatá la Filip ta ghəña skwi vla həñ

¹⁰ Yaw, ta rfu yu katakata da Mgham Yesu kabga ta nghan̄gha kuni ka i'i. Kahwathwata ta ndanay kuni ta i'i, fitika ghuni kul had̄ ya kəl tsi ka zagaptá fitik.

¹¹ Htaghuta skwi da i'i a kəl yu ka mnay mant̄sa guli wa. Dər má kinawu nzakwa dá, mamu skwi da i'i, had̄ skwi da i'i katək wu, taghaftagha yu ta tva nzaku nda rfu.

¹² Ka had̄ skwi ya ná, nda sna yu ka yu ta zay. Badu mutsatani ya guli, nda sna yu ka yu ta zay. Dər nda bagha yu dər nda maya yu, dər mamu skwi, dər had̄ tsi katək wu, taghaf tagha yu, nda sna yu ka yu ta nzaku mida.

¹³ Lavin̄lava yu ta ñaftá tsa skwiha ya nda mbrakwa Yesu Kristi ta vlihata.

¹⁴ Dər má mant̄sa ya nzakwani mndani, dina na skwi maga kuni, ka katihata ma ghuya dan̄wa dá na.

¹⁵ Nda sna kaghuni ka ghəña ghuni la Filipiya kazlay: Ma fitika zlafta dá ta mna gwada Lazglafta

ma hadfika Mekaduniya ná, had sana Igliz vluvus‡
 ŋni ta skwi nda hæŋ wu kə'a. Kaghuni yeya ta
 katihata ta sli'aftá yu ma Mekaduniya.

¹⁶ Ma fitika nzakwa da ma Tesalunik guli, si ta
 taghay kuni ta skwi§ ŋa da.

¹⁷ Gatá skwa ghuni a ta gatə yu wu, ta rfu yu
 katək kabga nda sna yu ta dza'a tfaghunaghatfa
 Lazglafta ta wi ta ghəŋa skwi vla kuni kə'a.

¹⁸ Zlghafzlgha yu ta tsa zdakatahuda ghuni ts-
 ghaf kuni ta Ipafrudita ya. Had skwi ta pədəgəltə
 yu wu, hwaslu hwasla katakata. Tsa skwi vla
 kuni ya ná, manda skwi dranaf lu ta Lazglafta ta
 zdəganata* katakata ya nzakwani.

¹⁹ Ma inda skwi htaghu kuni ya ná, Lazglafta
 da dza'a hdəghunamta, dza'a magay nda glakwa
 gadghəlani ma Yesu Kristi.

²⁰ Ŋa Lazglafta glaku ŋa kdəkedzeŋ. Amin!

Ga zgu

²¹ Ka ganaghata kuni ta zgu ta inda mnduha
 Lazglafta ma Yesu Kristi. Ta ga zgu gwal
 kawadaga nda i'i guli ŋa ghuni.

²² Ta ga zgu pdakwa mnduha Lazglafta ŋa ghuni,
 katkatatani gwal ma həga ga Sezar† la Ruma.

²³ Ka tfaghunaghatfa Mgham Yesu Kristi ta wi.

‡ **4:15** Mekaduniya: Ngha ta 2 La Kwareŋt 1:16. § **4:16** Aya
 15-16: Ngha ta Slna gwal ghunay 17:1, 2 La Kwareŋt 11:9. * **4:18**
 Gray nda Sabi 29:18, Afisus 5:2. † **4:22** Gray nda 1:13.

Deftera Lfida Dzratawi New Testament in Hdi

copyright © 2013 Wycliffe Bible Translators, Inc.

Language: Hdi

Translation by: Wycliffe Bible Translators

Contributor: Wycliffe Bible Translators, Inc.

Copyright Information

© 2013, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Hdi

© 2013, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-03-17

PDF generated using Haiola and XeLaTeX on 18 Apr 2025 from source files
dated 29 Jan 2022

f257b780-c0dd-5cce-9b20-430484439898